

AKASHVANI AIZAWL

REGIONAL NEWS BULLETIN

HEADLINES (EVENING)\

- Vawiin tlai dar 5 atang khan India leh Pakistan te chuan inkahhai an puang.
- Larsap Gen (Rtd) Vijay Kumar Singh an LADC-a Floor Test nei tura thu a pek angin LADC Chairman Pu T. Zakunga’n May ni 16 zirtawpni-ah Session a ko.
- Chief Scientific Officer Pu H. Lalsawmliana’n khawvel hmun dangte ban phak turin Science leh Technology lamah Mizoram hmasawn a ngai tih a sawi.
- Nausen kum khat hnuai lam thi zat tehna ah Mizoram chu rampum huapa dinhmun tha ber a ni a, Nau piang 1000 zela nausen 3 thi ang niin rampum huapa dinhmun tha ber an ni.

<><><>

CEASEFIRE

Vawiin tlai dar 5 atang khan India leh Pakistan te chuan inkahhai an remti. Foreign Secretary Vikram Misri chuan nichin lawk khan chanchinbumite kawmin ram pahnih sipaite chuan khawmual,van leh tuipuia inkahna thleng mek chu tlai dar 5 khan tihtawp an rel a ti a.Pakistan Director General of Military Operations chuan vawiin chawhnu inkahhai chungchangah India a rawn bia tih sawiin hemi hnu hian sawiho niin inhriatthiamna an nei thei ta a ni a ti.

<><><>

LADC

Larsap Gen (Rtd) Vijay Kumar Singh an Lai Autonomous District Council-a Floor Test nei tura thu a pek angin LADC Chairman Pu T. Zakunga’n May ni 16 zirtawpni-ah Session a ko.

Larsap in LADC thutkhawma Floor Test neih tur chungchanga thuchhuah tarlan danin tunhnaia BJP leh a thurualpui MNF thawhdunna United Democratic Alliance chu sawrkarna an siam thei ani tih finfiahna Floor Test nei tura tih an ni a, hetah hian BJP kaihhruai sawrkar chuan thlawptu an nei tam tawk em tih finfiah a ni dawn a ni.

Larsap hian Floor test neih tur chungchangah hian May ni 8 khan thuchhuah siamin a rang thei ang bera buatsaih turin thu a pe a, a tuk May ni 9-a thuchhuah tarlan danin LADC Session koh nan hun pek belh annih thu leh Session chu May ni 16 hma ngeia ko turin hriattirna pek an ni a, hemi chungchangah hian LADC Chairman Pu T. Zakunga chuan May ni 8 khan thuchhuah siamin LADC Session chu May ni 16 chawhma dar 10:30 a neih turin a ko a ni.

Puan tawh angin, LADC-a sorkar mumal a din theih loh avangin boruak a tang chho reng a, BJP leh MNF thawhdunna, United Democratic Alliance CEM atan MDC Pu N Zangura Governor in a ruat hnuah May ni 8 zingkar khan CEM atan Pu N. Zangura chu rinawmna thu tiamtira lakluh a ni a, CEM lakluh hi Lai Students' Association ten dan an tum ni a hriat a nih avangin LADC Office Complex, Council Veng leh New Vengpuiah te BNSS hnuaiah ni 2 chhung punkhawm khap a,

Hetih lai hian Lai Student’s Association chuan May ni 8-a thuchhuah an siam ah CEM lakluhna mipui hriatloha buatsaih chu Lawngtlai District mipuite zahlohna ani an ti a, hriatthiam harsa an ti tih sawiin a tul angin hma an la zel dawn tih an sawi bawk.

LADC ah hian tun dinhmun ah BJP MDC pahnih, MNF MDC 11 leh thlawptu Congress MDC pakhat nen BJP kaihhruai United Democratic Alliance ah hian Member 14 an awm a, ZPM in Member 11 a nei bawk a ni.

<><><>

AIZAWL BISHOP

Aizawl Bishop Most Reverend Stephen Rotluanga’n Catholic hotu lu ber atana Pope Leo IV thlan ani chu an lawm takzet a ti a, unau dang ten an tawngtai puina rahchhuah ani tih a sawi.

Akashvani palai zawhna chhangin Aizawl Bishop Most Reverend Stephen Rotluanga chuan kohhran dangte tawngtai puina ah an lawm thu a sawi a, Pope Francis ui taka an vuiliam hnuah a hmun luah tur Catholic kohhran hruaitu lu ber Apostol Peter aiawhtu ni turin Robert Prevost chu hlawhtling takin Pope atan thlan ani a ti a, a hming atan Pope Leo XIV ani a ti bawk.

Byte ... Aizawl Bishop

Pope thar tur Robert Prevost hi kum 69 mi niin Pope 267 na tur a ni dawn a, kum 2023 khan Cardinal niin khawvel pumpuia Cardinal 133 ten amah hi Pope Francis thlaktu atan an thlang tling a ni.

<><><>

NATIONAL TECHNOLOGY DAY 2025

Chief Scientific Officer Pu H. Lalsawmliana’n khawvel hmun dangte ban phak turin Science leh Technology lamah Mizoram hmasawn a ngai a ti a, a tangkaizia inzirtir nawn a pawimawh thu a sawi.

Akashvani palaiin a kawmna ah he thu hi sawiin Directorate of Science & Technology-a Chief Scientific Officer Pu H. Lalsawmliana chuan Mizoram sawrkarin science hmasawn nana a hmalakna chu mipuiten thlawp a pawimawh a ti a, khawvela thilsiam chhuah pung zelah midangte ban phaka awm ve a pawimawh thu sawiin thalai tih hmasawn a pawimawh thu a sawi.

Pu H. Lalsawmliana chuan kumina National Technology Day chu naktuk May ni 11 anih avangin a hmaa lo hman lawk ani a ti a, National Technology

Day in a tum ber chu zir bing mi te leh Science leh Technology lama inhmang te chawimawina leh hlawhtlinna hriatrengna a ni a, School naupang ten an puitlin huna an eizawna atan tun atanga Science lak anlo phur nan leh Science lak an hlah loh nana inhrilh hriatna atan hman thin ani tih a sawi.

Byte : Chief Scientific Officer

Nimin khan Aizawlah National Technology Day pualin hun hman a ni a, he hunah hian Mizoramin science & technology tangkai taka a hman dan chanchin ngaihthlak niin Innovation Facility Centre-a khawl hrang hrangte zirlaite a taka hrialhfiah an ni bawk.

Kum 1998 May ni 11 khan Rajasthan-a hmun pakhat Pokhran-ah hlawhtling takin India ramn nuclear a test a, He ni chhinchhiah tlak tak hriatrengna atan hian kum tin National Technology Day atan May 11 hi hman zui a ni ta a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

MIZORAM TOPS IMR

Nausen kum khat hnuai lam thi zat tehna ah Mizoram chu rampum huapa dinhmun tha ber a ni a, Infant Mortality Rate ah hian Sikkim leh Manipur te nen Nau piang 1000 zela nausen 3 thi ang niin rampum huapa dinhmun tha ber an ni.

Nimin khan National Health Mission hnuaia RMNCHA buatsaihin Planning & Programme Implementation Conference Hall ah review meeting neih a ni a, hetah hian Mizoram chu India rama Infant Mortality Rate dinhmun tha ber anih thu tarlan niin India sawrkarin survey a tihchhuah hnunung ber Sample Registration Survey ah chuan Mizoram IMR chu 3-ah dah a ni a, India ramah state 3 ti tha ber zingah a tel a ni.

National Health Mission Director Dr Lily Chhakchhuak chuan IMR target chu National Health Policy 2017 in kum 2025 ah chuan 16 aia sang lo tur leh SDG 2030 chuan 12 turin a rawn ti tih sawiin Mizoram chu an tling sa tawh a ti a, nau nu chungah thi tehna Maternal Mortality Rate nikumah 18 an nei tih sawiin Mizoram chu mi cheng an tlem avangin chhutsak an ni ngailo a ti a, nau chungah nu thihna uluk taka chhui thin anih thu a sawi bawk.

<><><>

EXCISE DEPARTMENT

Excise and Narcotics Department chuan kumin January leh May ni 8 inkara tlawmngai pawl hrang hrang te nen an thawhhona ah zu leh ruihhlo thahnem tak manin hemi kaihhnawihah dan bawhchhia mi 2737 an man.

Excise and Narcotics Department thuchhuah tarlan danin kumin January leh May ni 8 inkar khan Heroin kg 23 chuang an man tawh a, Methamphetamine kg 44 chuang man tawhin Ganja kg 118 leh Crystal Meth kg 48 an man tawh a, Opium kg 945 leh khuh damdawi bur 1748 leh Alprazolam tablet 15, 051 bakah Nitrazepam tablet 2130 man telin rakzu litre sing 2 sang 5862 an man tel a, zu bilh lai tin sing 6 chuang bakah dawidim kg 65 chuang manin sap zu bottle thahnem tak leh beer thahnem tak an man tel a, BEDC litre 1303 leh Soju bottle 195 an man tel bawk.

Excise thuchhuah tarlan danin Mizoram district hrang hranga tlawmngai pawl te leh Central YMA (CADS) bakah Branch YMA, YLA leh MTP bakah khawtlanga mipui thlawpna tha tak an dawn thin avangin lawmthu an sawi a ni.

<><><>

POWER BILL

Power & Electricity Department chuan nimin khan mipui hriattirna tichhuakin, Electric Bill siamna software thar hman tan a nih avangin Mizoram District hrang hrang ten Electric Bill an hmu tlai dawn tih an sawi.

Power & Electricity Department thuchhuah tarlan danin Aizawl, Lunglei, Serchhip, KhawzawI, Champhai, Lawngtlai, Siaha, Saitual, Kolasib khuaten electric bill an dawng tlai deuh dawn tih sawiin mipuite hrethiam turin a ngen a, Online a bill pe turte tan Consumer Number thar (Digit10) hman tawh tur a ni tih sawiin 'PEDM Consumer' App atangin internet banking, Cards leh UPI hmangin a pek theih tih an saw i bawk.

Power & Electricity Department hian nikum khan Mizoram puma prepaid meter hmang vek turin hma a la a, a hniam berah cheng 100 atanga top up theih ani dawn tih an sawi a, department hotute chuan prepaid metre hman hnuah pawisa chawi a tam phah dawn chuanglo tih sawiin dik taka mipuiten an eng chhit man an pek theihna tura ruahman ani an ti a, mipui huapzo thei ang berin ngaihtuahna an seng tih a sawi.

<><><>